



Čabu Tûbu Uruba ċûkã 2019

Mêdi su tudusã



Tûbu Uroba ċûkã, dûski 16 guyunoo dûski 18 ngirihĩ, ôwori yusu-ã sagahanu 2019 Geneve, Suisra ċabtuo. Čabu a aũ barayinã yagabi Mosko Hanadii-ĩ Borda ċĩĩ. Anna Hoo adaga Tûbu hilidi yê kalaka ammaa nduhui yê, duna ċeo.

Anna murta ôguzu ċaptuo. Anna ċabtundã numa ada du hayundu ċûo : Suisra, Firansa, Alumania, Holanda, Irlanda, Belšika, Lîbia, Nimsa, Amrîka.

Gunna du gubudi-ĩ

Sôbou numa ndurã sopurã yê aya numo annaa tîkã yê gunna šîša. Čĩidi yunu hoktiyindi ka ndurã yê adaga ndurã yê kundudi-ĩ yê nîŋi-ĩ yê : tunda gunna Tûbu. Ôwonni tunda aũ aũ hu hanayinoo gali. Toi yingaldu ċabtudo. Yunu yingaldu ċabtundã muro ka ndurã yê adaga ndurã yê duna yendiri. Ôwonni anna ndurã yunu buŋa ka ndurã yingaldu yogusĩ ċikã mannu duna yendiri.

Čabu-ã du mêde gurtakarã yê yuna su tigirdã yê yina hoo :

Ka ndurã yê adaga yê ndurã zaga nûri di bošĩ, zaga ada ndurã ha hukuru yendiri muro :

1. Amba ka yummaa-ã landar :

Film turo nakaar ([Suzanne Talhouk: Ka nuã yidũũ - Don't kill your language](#)), ka yuũ a su ċigirtai. Ôwonni beni sagahanu ka anna numo kîyi mooraa, to UNESCO yohodo ([International Year of Indigenous Languages](#)). Toi yingaldu yunu UNESCO ka yuũ a su yuhadĩ landar. Anna gunna mêdi a dûli di guyuo.

2. Ka tûbu (tudaga yê dazaga yê) yibedi hunã yê hilidi hunã yê horkusa ngo toguhudã yê nû toguhudĩ ċikã yê gunna landar :

Yuna Čad yê Niyer yê Libia yê ka tûbu yingaldu togusudã gunna kudohudar.

3. Tudaga-ã zaga arbidini mannu landar.

Waha ndoduri arbidi tudagaa kînni kohodar.

4. Arbi « F » zaga lûdini mannu landar (arbi a tudaga du ngo yugó).

Arbi a landarã tudaga du yugó, ċĩidi loko ċuduru tohoo arbindiri.

5. Čabu-ã su arrai gundurã : Tûbu Uruba ċûkã ngo koo di ka hundã ha duna ni ċendi ? Arrai anna ċaptunda yê yunu arraktu togusie kogĩ yê gurtakar. Taa arraia gala-ã yê yuna togusie kogã yê yopaar.

- Anna tûgimedee ċĩĩ hi du mêde ċuunje yê mêde yire yohodia yê hitaar. Nû koo anna ada ċabu a di hitaar : Radwan Wamer, Eli Kosso, Yûsuf Wordugu, Ousmane Honoré, Wuše (Simon Neuhaus). Sohi guda su yutiri.
- Sûgoi anna YouTube su horkusu yohodia mannu hitaar : Ousmane Honoré, Lemine Mahamat, Ali Issa, Dočĩĩ (Anja Neuhaus).
- Sûgoi anna guda mannu hitaar. Horkusu hundã zaga ada Uruba tobusudã ye anna hundã yê tudaga hiyindi. Toi yingaldu sagahanu naani ċabu ċinaki. Anna tada : Mûsa Tarsai, Khamis Abdelbasat, Yûsuf Wordugu, Eli Kosso. Anna kara ndihidda : Radwan Wamer, Wuše (Simon Neuhaus) yê Dočĩĩ yê (Anja Neuhaus). Ôwonni ôlloho yibendiri.
- Lôko wûdurtudundoo arbinduru ni anna turkuu ndennaa lau duna barandiri.
- Anna ada ha gurnayindiã : Adalla Taher, Brahîm Mahamat, Abdalla Reyeb.

Lôoše čabuu-ã :

- Gunna du gubudi-ĩ : Ka yummaa ka gunna du gubudda. Toi yingaldu tudaga ka gunna du gubudi tadaroo gali.
- Ada ndurã ha čera tudagaa yenduroo gali. Anna aŋgalda mannu adurasa tudaga yopuroo gali.
- Anna Čad yê Nîyer yê njûkã ndura husar Tudaa. Toi yingaldu ndura mannu tudaga zaga ka wetigaa togosodi hi su sigandu. Yoo telehizinã du arañguwoo zaga nungĩ hi sigandu.
- Malluã mbo khutba êllua tudaga du tuhatoo to tudaga ha budi duna čeni. Toi yingaldu arañguwoo tudaga du yuhatu.
- Aũ Tudoo ŋgaa čûwoo mannu arrakuna korã Mosko Hanadii-ĩ Borda čĩ hi duna ni če tigiri layi ni layi.
- Anna Tuda buya njîkã yê karanduda njîkã yê ôrozida njîkã yê arrañmoo korã tudaga yê anna tudaga hiliyindi čûkã yê hi duna yendu.

Mêdi a dûski 18, ôwori yusu-ã, sagahanu 2019 Geneve, Suisra du arbidudo.

Čabu gudi sagahunu 2020 tunaki. Kômma yê kôwura-ã yê zogo tuhati.

Yunu kor torkurã:

	<i>Frank suisraa</i>	€
Yagabi	CHF 2100.00	1.934 €
Maša	CHF 547.24	504 €
<u>Gunna</u>	<u>CHF 2647.24</u>	<u>2.438 €</u>